

**Naqqiut**

**Ataatsimiititaliap isumaliutissiissutaa 12. maj 2022-meersoq taarserpaa  
(Ataatsimiititaliap imm. 54-imik suliarinninnerani immikkoortumik allannguuteqarneq)**

**Mitit piniarneqartarnerisa sivitsorneqarnissaannik Naalakkersuisut  
peqqueneqarnissaannik Inatsisartut aalajangiiffigisassaattut siunnersuut.**

*Jens NapātôK'-mit, Naleraq siunnersuutigineqartoq*

**aamma**

**Kitaani kangianilu piffissami aalajangersimasumi mitit manniinik  
katersisarnermik ammaassisoqarnissaannik Naalakkersuisut  
peqqueneqarnissaat pillugu Inatsisartuni aalajangiiffigisassatut siunnersuut.**

*Jens NapātôK'-mit, Naleraq siunnersuutigineqartoq*

**pillugu**

**Aalisarnermut, Piniarnermut Nunalerinermullu Ataatsimiititaliap**

**siunnersuutit aappassaaneerpeqarnerannut**

**ISUMALIUTISSIISSUTAI**

Ataatsimiititaliap suliarinninnermini ilaasortarai:

Inatsisartunut ilaasortaq Hans Aronsen, Inuit Ataqtigiit, siulittaasoq  
Inatsisartunut ilaasortaq Jens-Frederik Nielsen, Demokratiit, siulittaasup tullia  
Inatsisartunut ilaasortaq Jens Kristian Therkelsen, Siumut  
Inatsisartunut ilaasortaq Mala Høy Kúko, Siumut  
Inatsisartunut ilaasortaq Agathe Fontain, Inuit Ataqtigiit  
Inatsisartunut ilaasortaq Charlotte Pike, Inuit Ataqtigiit  
Inatsisartunut ilaasortaq Hans Enoksen, Naleraq

UPA2022-mi ulloq 28. april 2022-mi siullermeerinninnerup kingorna ataatsimiititaliap  
siunnersuut misissorpaa.

**1. Siunnersuutip imarisaa siunertaalu**

Aalajangiiffigisassatut siunnersuutit ukua pillugu Namminersorlutik Oqartussat nalunaarutaat piniarnermik timmissanillu illersuinissaq pillugu nr. 17 28. oktober 2019-imeersaq allannguiffigineqassasoq siunnersuuteqartup kissaatigaa.

Siunnersuutigineqartut marluk immikkoortoq 53 aamma immikkoortoq 54, mannissartarnek ataatsimoortillugit suliarineqarput.

Siunnersuummi matumani siunertarineqartoq tassaavoq mitit amerlassusiinik naleqqussaaniarneq.

Killilersuutit inerteqqutillu eqqunneqarnerisa kingorna amerlerujussuarsimasut oqaatigineqarpoq.

Mitit amerlassusiisa piujuartinneqarsinnaasumik killilerlugit appartinneqarnissaat kissaatigineqarpoq.

## **2. Ataatsimiititaliap siunnersuutinik suliarinninnera**

Siunnersuutit siullermeerneqarneranni malittarisassat maannakkut atuuttut naleqqussarneqarfigisariaqartut partiit tamarmiullutik oqaatigaa.

KNAPK-mit ataatsimiititaliamut sassartitsisoqarpoq. KNAPK-mit akissutitut allagaq isumaliutissiisummut ilanngussatut kakkiunneqarpoq. Paasissutissat tunniunneqartut siunissami sulinissamat atatillugu eqqarsaasersuutigineqarnissaat ataatsimiititaliamit Naalakkersuisunut kaammattuutigineqarpoq.

Ataatsimiititaliap naatsorsuutigilluinnarpaa nalunaarummi allanngineq tusarniaassutigineqassasoq, tassani kattuffiit soqutigisallit sumiiffimmilu piniartut isummernissaminnut periarfissinneqassallutik.

Pisuussutinik uumassusilinnik atuilluarneq piujuaannartitsinissaq eqqarsaatigalugu pissasoq – aammalu pisuussutsit piujuartinneqartuaannassasut amerliartussasullu nalornissutaalissanngitsoq ataatsimiititaliamit nalinginnaasumik pingaartinneqarpoq.

Immikkoortoq 53, piffissaq piniarfusoq.

Mitit sumiiffiit ilaanni amerlivallaarujussuarsimaneeri ataatsimiititaliamit isumaqatigiissutigineqarpoq.

Nunami sanilitsinni, Islandimi, miternik mitillu manniinik tuniniaanermut killilersuutit allaanerusut paasissutissiisutigineqarpoq.

Tamanna ingammik Kalaallit Nunaata Kangianut sunniuteqarpoq, tassani unammillernermik assigiinngitsumik pilersitsisuunngitsumik inatsiseqarnissarput ilungersuutigineqartariaqarluni. Zone 1, 2 aamma 4-mi mitit killilimmik ullormut pisareqqusaasut atorunnaarsinneqarnissaanut periarfissaqartoq Aalisarnermut Piniarnermullu Naalakkersuisup oqaaseqarsimaneeri ataatsimiititaliamit ajunngitsutut isigineqarpoq.

Zone 3-mi allannguisoqannginnerani piniartut biologillu oqaloqatigiinnissaat utaqqeqaarneqartariaqarpoq.

Isumaliutissiisummi UKA2013/37-mi (appanik illersuineq) siusinnerusukkut siunnersuutaanikuuvoq timmissanik allanik piniarneq, soorlu assersuutigalugu miternik, nutaamik nalilersuiffiginissaanut Naalakkersuisut suliniuteqassasut.

Kalaallit Nunaanni Pinngortitaleriffimmit biologit mitit pillugit siunnersuutaat, (10. oktober 2013) assigiinngitsutigut allaaserineqarpoq. Nalunaarusiami oqariartuutigineqarpoq taamanikkut Kalaallit Nunaanni mitit pillugit aqutsiveqarfinnut pilersaaruteqanngitsoq. Mitit qiviuinik katersinissamut tunngasunik aamma siunnersuisoqarnikuuvoq ullulerneqartoq 28.oktober 2011, tamannalu taamanikkut soqutigineqarluni.

Atorluaasarnissap allanngortinneqarneranut atatillugu Pinngortitaleriffimmit oqariartuutigineqarpoq, ullumikkut pisassiissutit qaffasinnerusut timmissanut assigiinngitsunut sisamanut ataatsimoorussamik pisassiissutaasut taamaattumillu timmissat allat sunnerneqarnissaat nalilersorneqaqqittariaqassasoq.

Taamaattumik qaffasinnerusumik pisassiisoqartalenera issittumi appat, appat nalinginnaasut, qingallit mitillu piniagaaneranunat oqilisaataasinnaassaaq. Allannguisoqannginnerani tamanna misissorneqassasoq ataatsimititaliamit kissaatigineqarpoq.

Nipisanniarnermut atatillugu qassutini miternik pisat saniatigut pisaqartoornert annertungaatsiarput.

Tamanna nakkutigilluarneqartariaqarpoq nalunaarusiorfigineqartassallunilu, taamaalilluni ilaatigut aalisarnermut MSC-mik nalunaaqutsersuineq sunnerneqassanngilaq. Taamatut pisat saniatigut pisaqartarneq eqqarsaatigalugu siunertanut inunntut namminermt atorneqarsinnaanersut kiisalu kalaalimineerniarfinni suliffeqarfinnulluunniit tuniniarneqarsinnaanersut eqqarsaatigineqartariaqartoq ataatsimiititaliamit oqaatigineqarpoq.

Pinngortitaleriffik nalunaarusiaminni ulloq 10.10.2013-imeersumi allapput, 2008-mi saniatigut pisarinqartut timmissat 6000 missaaniittut nalunaarutigineqarsimasut. Taamanikkut Pinngortitaleriffiup nalilerpaa nipisanniarnermi, Kujataaniunerusoq, saniatigut pisarinqartut kisitsisitavii ukiumut mitit pisat saniatigut pisarinqartut 6000 aamma 20000 akornanni amerlassuseqassasut.

Nipisanniarnermi pisat saniatigut pisarinqartut kisimik inatsit malillugu nalunaarutigineqartassasut ataatsimiititaliamit maluginiarneqarpoq. Assersuutigalugu "umiarsuarmik aporlugit pisarisuukkat" nalunaarutigineqartariaqanngillat.

Immikkoortoq 54, mannissarneq.

Nammineq atugassanik mitit manniinik mannissartarneq atuutilersinneqartariaqarpoq

aalajangersimasumillu piffissarititassat piaqqiorfiinut nalequssarneqassallutik. Mannissarniarsinnaanermut akuersissuteqarneq zoneni tamani atulissasoq ataatsimiititaliamit oqaatigineqarpoq.

Pisiniarfinnut tuniniaqqitassanik mannissarniarneq pisortat piumasaqaataasa ataanni inissisimasussaassammat tamanna massakkut suliarineqarnissaa kissaatigineqanngilaq.

Sumiiffimmi piniartut misilittagaat biologillu siunnersuutai nalunaarusiap suliarineqarneranut ilanngunneqassasut ataatsimiititaliamit piumasarineqarpoq.

### **3. Siunnersuutit aningaasaqarnikkut kingunerisassai**

UPA2022/53 (piffissaq piniarfiusoq):

Inatsisartut suleriaasianni § 33, imm. 1-imi ima allassimavoq, siunnersuut tunngavilersugaassasoq siunnersuutillu aningaasatigut allaffissornikkullu kingunerisassai allaaserineqarsimassallutik, aalajangiiffigisassat ilusilerneqarsimassalluni taaguuserneqarsimassallunilu.

Siunnersuut piviusunngortinneqassappat aningaasatigut kingunerisassai siunnersuummut naapertuuttumik allanneqarsimasut ataatsimiititaliamit paasineqarpoq. Nassuiaasioq A/C-p ukiup affaani sulineranik 250.000 koruuninik akeqartussat siunnersuuteqartumit nalilerneqarpoq.

Tamanna pillugu ataatsimiititaliaq oqaaseqaatissaqanngilaq.

UPA2022/54 (mannissarneq):

Inatsisartut suleriaasianni § 33, imm. 1-imi ima allassimavoq, siunnersuut tunngavilersugaassasoq siunnersuutillu aningaasatigut allaffissornikkullu kingunerisassai allaaserineqarsimassallutik, aalajangiiffigisassat ilusilerneqarsimassalluni taaguuserneqarsimassallunilu.

Siunnersuut piviusunngortinneqassappat aningaasatigut kingunerisassai siunnersuummut naapertuuttumik allanneqarsimasut ataatsimiititaliamit paasineqarpoq. Nassuiaasioq A/C-p ukiup affaani sulineranik 250.000 koruuninik akeqartussat siunnersuuteqartumit nalilerneqarpoq.

Tamanna pillugu ataatsimiititaliaq oqaaseqaatissaqanngilaq.

**4. Ataatsimiititaliap inassuteqaatai**

UPA FM2022/53 (piffissaq piniarfiusoq) pillugu ataatsimiititaliap inassuteqaatai:

Ataatsimiititaliap isumaqatigiittup siunnersuutip akuerineqarnissaa inassuteqaatigaa.

UPA2022/54 (mannissarneq) pillugu ataatsimiititaliap inassuteqaatai:

Ataatsimiititaliap isumaqatigiittup siunnersuutip akuerineqarnissaa inassuteqaatigaa.


12.05.22

UPA2022/53  
UPA2022/54


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Hans Aronsen  
Siulittaasoq




Jens-Frederik Nielsen  
Siulittaasup tullia




Agathe Fontain



Charlotte Pike



Jens Kristian Therkelsen



Mala Høy Kúko



Hans Enoksen